

Tur shete Minister ta conoci sin participacion oficial

AYERA mainta e dos formadonan cu ta Mike Eman y Gerlien Croes, a efectua un bishita cerca Su Excelencia Gobernador Alfonso Boekhoudt, caminda e proposito di e bishita aki tabata pa entrega number di candidatonan di e dos partidonan, pa posiblemente bin na remarca pa ocupa un puesto ministerial. Ningun di e dos formadonan kier a anuncia oficialmente e candidatonan pero en realidad como Aruba tin un comunidad chikito, for di algun siman caba number di e posibel Ministernan a bira conoci.

A pesar di e secreto 'publico' aki, tanto Gerlien Croes di Futuro como Mike Eman di AVP, no tabata dispuesto pa divulga number di nan ministernan, insistiendo cu nan tin cu duna y muestra respet pa un proceso cu tin su reglanan, combina cu aspectonan etico. Sinembargo for di momento cu e proceso di formacion a inicia, yatabata conoci extra oficialmente cu tanto Gerlien Croes como Geoffrey Wever, lo t'e dos candidatonan di partido Futuro pa ocupa puestonan ministerial.

Pa loke ta partido AVP esaki tampoco ta oficial ainda pero pa algun siman caba tin especulacionnan tumando luga caminda hasta a papia cu lo tin controversia y division den e partido berde pa motibo di candidatonan cu kier ocupa un puesto di Minister na luga di bira miembro di Parlamento. Dialuna anochi den un Consejo di Partido AVP, a atende cu e asunto aki caminda consejo di partido a aproba number di e cinco candidatonan pa bira Minister den e proximo gabinete cu AVP lo lidera pero un biaha mas sin duna participacion oficial di e cinco politiconan.

Ayera merdia despues di bishita na Gobernador, tampoco e formadonan, a pesar di insistencia di prensa, a keda para riba nan punto cu nan tin cu muestra respet na un proceso asina serio y importante y no a haci esaki tampoco.

Sinembargo e candidatonan di partido AVP a ser exponi den diferente speculation bayendo rond pa algun tempo caba y cu awor, a pesar cu e partido no a haci un anuncio oficial, ya nan ta conoci.

Mike Eman lo ta Prome Minister y Minister di Asuntonan General, mientras cu e otro ministernan lo bira Wendrick Cicilia, Mike de Meza, Arthur Dowers y Melvin Wyatt Ras kendenan lo completa e cinco ministernan di e partido. N'e momentonan aki tanto Gerlien como Geoffrey hunto cu Gino Goeloe ta miembronan di Parlamento pero cu Gerlien y Geoffrey birando Minister, lo drenta na nan luga Ruthlyn Lindor y Muzaninn Wever. Di parti di AVP e fraccion cu a huramenta na luna di Januari ultimo, cinco lo bandona e posicion aki pa bira Minister, y na nan luga lo drenta Carlos Bermudez, Marlon Sneek, Otani Thomasia, Jon Hart y Dennerick Kelly.

Nan lo tuma e posicionnan di Mike Eman, Wendrick Cicilia, Mike de Meza, Arthur Dowers y Melvin Wyatt Ras y tin cu señala cu Marlon Sneek ta wordo considera for di algun tempo caba como e candidato principal pa bira Presidente di Parlamento, puesto cu ta wordo ocupa actualmente pa Gerlien Croes mientras cu Jennifer Arends Reyes tambe ta ser menciona pa bira 'lider di e fraccion berde.' Sinembargo p'e participacion oficial lo tin cu spera probablemente te aki dos siman pa te prome siman di Maart ora cu segun e dos formadonan, nan gobierno nobo lo ta cla pa tuma mando di e pais.

Prolongacion encargo di formacion Gobierno di Aruba

GOBERNADOR di Aruba, Su Excelencia Alfonso Boekhoudt riba 14 di januari a apunta señor Michiel G. Eman y señora Gerlien L. Croes como formado. Durante di e simannan siguiente, e formadonan a informa Gobernador regularmente tocante e progreso den e implementacion di e encargo di formacion.

Ayera e formadonan a entrega Gobernador un relato provisional. Formadonan a indica cu a papia c'un gran cantidad di organisacion durante di e ultimo simannan. Sinembargo, e evaluacion di capacidad di e candidatonan p'e funcion di minister y di minister plenipotenciario, segun e exigencianan di e 'Landsverordening integriteit ministers' no a cuminsa ainda. Mirando cu e evaluacion ta wordo realisa pa garantiza integridad di administracion publico, ta di importancia pa permiti suficiente tempo pa realisa e evaluacion aki p'esaki sosode cuidadosamente.

Gobernador di Aruba a pidi formadonan pa riba 13 di maart mas tarda, presenta na su persona e acuerdo di gobernacion definitivo, e reparticion di cartera y pa sigura cu riba e fecha ey tambe e resultado di e investigacionnan haci bao di e 'Landsverordening integriteit ministers', por wordo discuti.



Ministro encarga cu Turismo & Salubridad ta anuncia cu entrante **20 februari 2025** durante 14 dia lo tin oportunidad pa un y tur tuma conocimiento na Departamento di Legislacion y Asunto Huridico, **Schotlandstraat 53**, di un peticion cu a ser haci pa obtene un **hotelvergunning** pa e parcela na **Elleboogstraat 21-23**. E permiso aki ta concerni e.o. benta di bebida sterki por detal y cuminda pa wordo consumi den e parcela. Den e periodo aki tur hende por expresa por escrito nan desacuerdo contra dunamento di e permisonan menciona, dirigi na e Ministro encarga cu Turismo & Salubridad via intermediacion di Director di Departamento di Legislacion y Asunto Huridico, Schotlandstraat 53.